


四明叢書

張宗祥



錢忠介公集卷二十一

附錄一

葬錄上 文

錢虞孫先生葬錄序

同縣 董劍鏐 孟威

始翁洲之敗績也華亭張相公以其家二十七人殉時
則有僧無凡者從南海來拾諸骸骨聚族而墓焉蓋吾
黨每津津樂道之茲讀錢先生葬錄而後乃知天下士
固有懷仁抱義奮不顧軀如葉君子器暨獨耀諸上人
者作之先也雖然無凡故張公部下將事公久葬公事
宜若葉君之於先生一浙一閩千里而遙非素有聞聲

之思與謀面之雅而一旦舉已枯之骨重致其殷勤難
矣至隱元獨耀實方以外士俛俛焉竭其股肱之力不
敢告勞抑又何爲者耶嗚呼自乙酉義旅之興四明之
從先生起者夥矣吾見有藉先生以肥家而反而辱身
顧乃詆非先生怨冒先生者至今存也試以是錄授之
有不汗流浹背逃死末由者乎予悵不能一造槩山中
顧瞻邱隴肅拜諸君子下風而猶幸從是錄想見其人
彼以仁人長者之心而建烈丈夫事又申之以烈丈夫
之言則古稱三不朽舉備是也聞得而差次之葉君功

上上隱元慨然捐土獨耀歷試諸艱次之又次則鶉居
上人之勞瘁菊潭劉公之碑銘並至性激發者矣他若
閻公諫行之詳何君自責之摯諸禪人弔哭之殷咸有
足多焉雖然方諸君子之爲是舉也則固了了生死之
外而後克底於成事詎任受功而吾顧以庸豎之見爲
之差次焉吾過矣蓋閭故多異人如所南皋羽輩至今
未墜也冬青紀陵事頗類此而儉德滋深卽慷慨疾怨
無痛快心史一書者然尙需鐵函之固久而始啓卒未
有毅然申大義於天地之間氣不少訕言不少諱若是

錄者也豈非先生至誠昭假信能然耶初先生登鄉書
爲吳巒稚公所取吳公則與華亭張公同盡節翁洲者
也師弟子之立身固若合符節哉

東閣大學士兵部尙書贈太保吏部尙書忠介錢

公神道碑

長樂

劉沂春

魯菴

君臣大義今昔爲昭凡我有心同倫共貫時平則酌其
可時艱則竭其誠事之成敗身之存亡身後之收棄皆
所不計也值夫不可爲之時委於無可如何之數一折
卽挫計無復之高尙不事志可則也蹇而有躬能無尤

乎故凡死而無聞士所不取皆於名義或虧焉者也若
忠介錢公盡知此義矣公諱肅樂字希聲別號虞孫浙
東鄞人也曾祖諱鳳午封承德郎禮部主事祖諱若賡
隆慶辛未進士江西臨江府知府父諱益忠以明經任
甌東瑞安學博累代簪纓承家詩禮忠孝之教匪一日
矣公娶夫人董氏生子二長曰兆恭次曰翹恭公穎悟
敏求學問該博十七歲補弟子員踰年食餼廩崇禎丙
子舉於鄉丁丑成進士試牘膾炙人口觀政都察院授
太倉州守慈斷廉明庶民懷之考成晉北京比部員外

郎以丁外艱未任甲申烈皇帝賓天弘光改元乙酉公
家居舉義旗將踰浙以北應援者少乃停旅江干浙東
得保暮年皆公與同事諸公之力也易月移時鼓壯奪
人之魄九月隆武起公都察院右僉都御史大獎其才
力云丙戌秋勤王之師不濟糧匱矢竭振旅而圖更舉
時會稽熊公汝霖護監國主揚帆入閩舟次鷺門與建
國公鄭彩協謀興復公不知也公以舉事不成故鄉難
處亦挈家破浪而南寄居福唐人亦不知公也久之未
聞有倡義者公潛行至龍峯巖從僧碧居祝髮殆將隱

矣因題壁云一下猛想時身世不知何處數聲鐘磬裏
歸途還在這邊公豈願終老緇流耶居八閩月則丁亥
初秋時也監國主移舟琅江聞之起公大司馬公幡然
從之紓策運籌日辟國百里宵旦經營心血俱枯謂大
事可立就以水陸不相能費盡調停城府猶未破憤恚
欲絕誓不獨生其家人知之相對無怡色蓋以公心爲
心也越戊子春正月熊公歿於變揆席乏弼拜公東閣
大學士兼兵部尙書與馬公思理皆贊密勿公參政握
樞肩任實繁形容憔悴日嘔血數升至六月五日而台

星殞矣天不我將哲人其萎卒年四十有二上聞之輟朝三日遠近心惻素車白馬絡繹琅江余時從公後遇病歸曾束芻哭之眾爲之請卹輿遣官致祭贈太保兼吏部尙書諡忠介生榮死哀幾有如公者乎惟時臨公喪者長子兆恭弟侍御肅圖簡討肅範兵曹肅遴居兩月時事多難不留不處或渡翁洲或入長水或出秦川承公意也公未卒時嫂陳氏姪克恭夫人董氏內兄董酉皆以憂勞相繼淪胥幼子翹恭亦隨以殤聚族死忠可哀也已迨今甲午六改春秋矣天不雨錢人不惠夢

諸棺骸猶頓荒邱余不能爲力抱疚殊甚舊年公子弟
寄聲欲舁棺骸歸道之云遠今猶未也豈措貲艱也亦
行路難也福唐葉太史子器杜門數年矣頃聞公之忠
義一門盡瘁以死大爲歔歔毅然爲之營葬從黃檗寺
隱元禪師乞地師忻然許之遂命其徒獨耀走運琅江
棺骸往來三百里跋涉艱辛而碧居與其徒法可不忘
前誼執紼偕行以甲午二月二十六日卜葬黃檗山麓
屬余繕碑余年七十久病眼矇偃臥巖阿於外事無聞
見頗能言公心跡憶公恆與余言吾食本朝三百年厚

恩世受光寵身膺華袞欲報之德九京難泯茲甲申以來三年三易吾主攀髯莫及何處依光天難籲也地難控也秦庭之師難乞髮膚不敢自愛也有形之詠云萬山慘綠雨聲中收拾繁華一枕空又云一曲伊川無限恨不勝悲淚灑衣紅公之處心行事可貫金石而泣鬼神天有不爲動人有漠然不相關者乎事未成也天未定也久而葬也人方醒也公伯仲伊傅而莫展其訓命上下方召而未竟其戰伐徒存萬死不屈之概自靖自獻而已初非坐朝與燕之榮繼非專閭重關之寄事危

而隱其誰說之一舉而返可以已矣再圖而藏可自安
矣踰險歷辛不甘自廢呼卽起而蹶猶張有幸其敗忌
其存迫窮相棄不恤也使公值變苟全老死牖下聲義
塞責屬纊里門蓋棺抔土周親拜葬於事畢矣又不然
遠遁深山攜家種粟爲桃源之避彼此不調甘毀前蹟
不交南北之歡引身以退卸任之他亦泯泯死矣子器
於公非一面之識非莫逆之交非世誼之雅不介而爭
不謀而合爲之哀樂佳城廣覆族類立田延祀豎碣表
旌不啻若其親戚何哉怒蛙宜式駿骨亟收公之誠未

有不動者也京果赦死汪童不殤公之族殊令人思也大義相綰白骨可肉萬古如生果待脛而馳待翼而飛待聯而契耶公感子器之真子器計公之終永公之譽兩無遺憾非苟然也今後臣貳其君家戾其主薄其親而棄其友者視此刻文愧矣愧矣人心不死分義長存公蓋有造於風教也僅一時爲烈哉銘曰

槩山之麓宏敞騰雄乾坤留此以待名公地閩公越馬牛其風踰險盡瘁琅水匪躬夜臺未築雲護玄宮文忠有後慕義無窮爲度寢所大小相從千秋兩祀載勛精

忠見者嗟異聞者惕中霄壤悠久公與俱終始知公忠
無貳志決不殊奏功從古死者非一超異孰與公同前
已伸其顯節後可勸乎臣工兆域爰開斯土魂游南北
西東尙亦利公嗣世川原環拱鬱蔥

附碑陰識語

釋性曰

葬有貞珉志不朽也是役也始於甲午二月廿三日竣
於乙未九月十七日歷月十九日五百有八十厥惟艱
哉書此以見成事之難昔人云功不浪施信然信然

貞羣按康熙鄞志云運柩者海寧姚翼明後爲僧名

性日稱獨耀上人

錢希聲先生誄

并序

華亭

徐孚遠

閻公

戊子六月五日錢希聲先生卒於閩之琅琦蓋客寓也
居無何義師潰敗方事之殷門故咸奔幼孤北歸不及
奉櫬以行停柩逆旅六年於茲矣歲在癸巳厲禁稍解
道有行人玉融葉君子器聞風愴悼謀於姚君興公將
爲先生卜安魄之區旣得吉於槩山之東坂姚君則徒
步數百里致先生之柩三喪從焉甲午臘月始克竟厥
事以余與先生有話言之舊又俱作旅人義無愧詞授

之素旗用志不朽乃爲誄云

先生名肅樂浙之鄞人不詳其先世父益忠司鐸瑞安先生登丁丑進士第知太倉州事潔修惠政遐邇流聞召爲比部員外郎未上以司鐸訃至守制歸里會國變與同志起義未及抵行在閩已陷變名姓避地福清之前薛居期年魯監國師至先生來朝行本兵事兵柄有屬具官而已先生知大業難濟發憤嘔血而卒始先生在浙時隆武已晉秩都憲及監國承制復晉秩大司馬輔政先生疾革以無功而貴匪榮伊戚遺命止稱先朝

本秩故銘幽之文不敘官列從素志也其辭曰

運周而圯天步其蹙洪濤孰湮奔曦難逐嗚呼先生罹此不穀退無安林進有折軸憶昔藝苑家擅芳蓀探賸味腴乃尋於根藹藹吉詞要而不繁登乎明堂比德璵璠剖竹於婁以雨以霜野有馴雉庭有神羊庶績既熙其政馨香天子召我高步文昌奉諱於廬乃返初服在疚煢煢蠲茲魚菽莽莽胡塵覆我邦族投袂用墨不遑卒哭神明有主奠此宗支豈曰當璧以揚國威釋位而勤前輝是儀綱紀初布前茅已披余方持節公亦攜家